

Scuol darcheu ün'eivna suot l'insaina da l'aua

Terz'Eivna da l'aua cun nouvs arrandschamaints

(anr/fa) Las funtanas da l'aua minerala in Engiadina Bassa fuorman la basa dal turissem da tuot la regiun. Perquai organisescha la TESSVM daspö l'on 2012 arrandschamaints multifars cul tema aua. Minch'on als 22 da marz vain celebrà il Di internazional da l'aua, proclamà da l'ONU. L'aua giouva in Engiadina Bassa ün'importanta rolla, las funtanas d'aua minerala han fuormà qua nempe la basa dal turissem da tuot la regiun. Perquai vaivan ils responsabes da la Turissem Engiadina Scuol Samignun Val Müstair SA (TESSVM) decis dad organizar als 22 marz 2012 ün Di da l'aua regional cun da tuotta sorts arrandschamaints in connex cun l'aua: «Üna da nossas fermezzas centralas es l'aua, a la fin as cugnoscha nossas funtanas d'aua minerala fingià daspö l'on 1369», disch Urs Wohler, il directur da la TESSVM. Quel Di da l'aua in Engiadina Bassa ha gnü uschè grond success cha'l turistikers han decis dad organizar minch'on ün'eivna intera suot l'insaina da l'aua. Sco manader da l'organisaziun hana incumbenza a l'uschenomnà ambaschadur da l'aua Ernst Bromeis dad Ardez. «Insembel cun el s'haja pudü ingaschar nella prüm'Eivna da l'aua perfin a Jean Ziegler chi ha tut in seis referat suot ögl il tema aua ed alimentaziun i'l focus global.» Eir per l'Eivna da l'aua d'ingon han ils organisatores invidà a differents refevents cuntschaints.

Moritz Leuenberger accumpagnà da Risch Biert

Nöglia nu collia (o separa?) daplü co l'aua! es il motto da la terz'Eivna da l'aua in Engiadina Bassa. Quella cu-

mainza in sonda, ils 21 marz a las 20.00 in sala cumünala a Scuol cul referat da l'anteriori cusglier federal Moritz Leuenberger «Und wo bleibt das Wasser?» Seis referat gnarà inromà culla musica dal pianist indigen Risch Biert. Il cult divin da Jon Janett, il ravarenda da Scuol, in dumengia, ils 22 marz tema-

tischescha eir l'aua. Scolaras e scolars da la scoula da musica regionala sunaran plüs tocs chi han eir da chefar cun l'aua e sia melodia. Davo il cult divin drivan Urs Wohler e l'anteriori capo da Scuol Jon Domenic Parolini ufficialmaing l'Eivna da l'aua 2015 fond imprimigas cun indigens e giasts cun aua forta da

la funtana Sotsass. Quella cula our dal chüern dal bügl in Plaz.

Üna tarabla davart l'or blau

Illa biblioteca in Chasa du Parc a Scuol quinta Annetta Baumann in lündeschdi, ils 23 marz a las 17.00 ad uffants da tschinich fin desch ons ed a lur geni-

tuors o bazegners e nonas la tarabla «Blaues Gold». La saira a las 20.00 vain muossà i'l Bogn Engiadina Scuol (BES) il film «Kon-Tiki – mit dem Floss Kulturen verbinden». Ils preschaints pon verer il film sezzond i'l batschigl grond o a l'ur da quel. In mardi salva la Pro Büvetta Tarasp presidiada da Werner Reichle a las 20.00 i'l Café Benderer a Scuol sia radunanza annuala. A las 20.45 tegna l'architect ed editur da la gazetta Hochparterre Köbi Gantenbein ün referat «Trennen Mauern was ursprünglich verbunden war?». In marcurdi a las 20.00 tegna Ernst Bromeis i'l Hotel Aurora ad Ardez ün referat cul titel «Ardez liegt am Rhein». In gövgia invidan Irma Wehrli e Jörg Perron a las 17.00 illa sala da festa i'l chastè da Tarasp a l'ur concert «Alles im Fluss» süi l'orgel istoric dal chastè. In gövgia vain muossà i'l BES il film «Watermark – Ein Film von schrecklicher Schönheit».

Dals dramas culs fügitivs sül mar

Per venderdi, ils 27 marz ha organisà l'Uffizi per migraziun dal Grischun a Cuoirà ün discours da cusglier guvernativ Christian Rathgeb e collavuratuors cun Anja Klug da l'UNHCR (ot cumissariat da las Naziuns unidas pels drets da l'uman). Davo quist discours chi nun es public vain Anja Klug a Scuol. A las 20.00 vain realisada cun ella l'occurrenza «Lampedusa – eine zivilisatorische Odyssee». A la fin da quella serra Urs Wohler cun ün pér pleuds personals la terz'Eivna da l'aua in Engiadina Bassa.

Infoinformaziuns davart las ulteriuras occurenzas dürant l'Eivna da l'aua as chatta sulla pagina d'internet www.uno-weltwasserwoche.ch



Eir ingon vegnan muossats a chaschun da l'Eivna da l'aua plus films i'l Bogn Engiadina a Scuol.

FOTO D. TÄUBER

Scolars d'Avrona pro la Motta Naluns

Inscunter a chaschun dal giubileum cumünaivel

«Nossa scoula ha decis da realisar invezza be dad ün'unica festa da giubileum plü gronda dürant tuot l'on differentas occurrentas pedagogicas e culturalas», ha explichià Mayk Wendt. Insembel cun David Brodbeck maina el la Scoula d'Avrona. «Sco minch'on vaina spüert eir quist on nos program d'inviern cun gitas da skis e cun gianellas, lura faina eis passlung e'n vain partecipats al Maraton engiadinal.» Movimaint e sport es üna da las devisas pedagogicas da la Scoula d'Avrona. Tuot ils scolars sco eir magisters ed impiegats da la scoula han üna carta da stagjun da la Motta Naluns. «No eschan stats quasi mincha fin d'eivna culs scolars sulla Motta.» Cur cha'l responsabes da la Scoula d'Avrona sun gnüts a savair ch'eir las Pendicularas



Mayk Wendt, Egon Scheiwiller e David Brodbeck (da schn.) illa staziun suot da las pendicularas.

Motta Naluns SA existan daspö 60 ons, es neda insembel cul directur Egon Scheiwiller l'idea da far alch insembel.

Plü gugent investir co festagiar

Las Pendicularas Motta Naluns SA han decis da desister da grondas festivitats da giubileum quist on: «Illa nouva s-chabellera da Prui a Clünas investina var nov milliuns francs. No dovrain quellas finanzas per quai e na per far festa», ha declerà Egon Scheiwiller, il directur da las pendicularas, «eu n'ha però invidà als scolars d'Avrona da gnir ans far la visita e's laschar preschantar nossa gestiun e nossas maschinias.» Sco punct culminant han tschinich furtünats pudü ir in marcurdi saira amo ün toc cun la maschina da pista. «Per decider chi vaina trat la büs-cha», ha dit Wendt riond.



Il directur Egon Scheiwiller ha retschevü la visita d'Avrona.



Als preschaints esa gnü demonstrà co cha quista maschina prepara ils skis.

FOTOS F. ANDRY